

## HE TUITUHINGA.

NO NGA MAHI A TE HUI O TE HAHI MAORI O TE TAKIWA O TURANGA TAE ATU KI TE KAHA, I WHAKAMINEA KI TE WAITAKARO I TE PARIHA O WHAREPONGA, I TE 3 O NGA RA O TIHEMA, 1888.

NO te 2 o Tihema i tae tahi ai me te tangata whenua ki te whakapuaretanga o te whare-karakia o Mikaera, Anahera; e 90 i tango i te Hapa a te Ariki; i puta hoki te kohikohi o te Ohaohatanga £4 9s. 10d., mo te perehitanga i nga mahi a te Hui.

No te 10.30 o nga haora i te awatea, i te 3 o nga ra o Tihema i huihui ai nga tangata o te Hui ki te whare-karakia o Mikaera, karangarangatia ana nga ingoa me te whakao enei ki o ratou ingoa:—

*Minita*: Te Wiremu Atirikona, Rev. Mohi Turei, Rev. Matiaha Pahewa, Rev. Areka Whareitumu, Rev. Edward Jennings, Rev. Rutene Te Aihu, Rev. Rihara Rangamaro, Rev. Matenga Waaka, Rev. Eruera Kawhia, Rev. Hone Waitoa.

*Mangai Reimana*: Hare Paihia, Pita Pokia, Paora Te Haenga, Hakaraia Mauheni, Rihara Paipa, Tamati Ngakaho, Iehu Pakatai, Wiremu Tahata, Erueti Rena, Peniamine Te Awarau, Apirana Pahina, Patara Rangi, Rutene te Arahi, Hare Noanoa, Tipene Tutaki, Hori Pakapaka, Paora te Hau.

Katahi ka ki te Upoko kua tu te Hui ka timataia hoki e ia te mahi ki te inoi.

Muri iho ka whai-korero te Upoko ki te Hui.

---

## WHAI-KORERO A TE UPOKO.

E hoa ma, e nga tangata o te Hui:—Tenei kua tae mai te pukapuka a to tatou Pihopa hei whakaatu mai i tona roa ki tawahi i kore ai e kitea mai ki roto ki a tatou i tenei ra. I huihui atu ratou, kotahi rau e wha tekau ma whitu nga Pihopa; mea ake ka puta mai nga korero o to ratou whakaminenga. Kotahi te mea i kiia mai e ia kia whakaaturia e ahau ki tenei Hui, ara, ko tona taenga ki te Komiti o te perehi Paipera i Ingarani, ki te whakaatu i te hiahia nui o te Hahi Maori ki tetahi Paipera reo Maori kia perehitia, me te mau ano nga rarangi whakamarama ki te taha o ia wharangi, o ia wharangi, kia rite ki etahi o nga Paipera reo Ingarihi. I tae ano ki reira te Pihopa o Whakatu (Nelson) he tuara i taua korero, a whakaaetia ana e taua Komiti. Kia mahia atu i konei nga rarangi, katahi ka perehitia.

Tetahi mea i kiia mai e ia kia whakaaturia ki te Hui, ko tona hiahia kia tae wawe mai ano ki te tirotiro i nga tangata o tenei takiwa o tona Pihopatanga i roto i enei marama e haere ake nei.